

摘藻堂四庫全書薈要

經部

欽定四庫全書薈要

經部

公羊注疏卷十三



欽定四庫全書薈要卷一千二百十七

經部

春秋公羊傳注疏卷十三

起文公元年盡九年

漢何休學

唐陸德明音義

文公

元年春王正月公即位

二月癸亥朔日有食之注是後楚世子商臣弑其君楚

滅江六狄北侵中國疏

注是後至其君解云即下經云冬十月丁未楚世子商臣弑其

君鬬是也○楚滅江六解云即下四年秋楚人滅江五年秋楚人滅六是也○狄北侵中國解云即下四年夏

狄侵齊七年夏狄侵我西鄙之屬是也

天王使叔服來會葬

傳其言來會葬何注据奔喪以非禮書歸含且賵不

言來音義

歸含本又作哈戶暗反五年經同賵芳鳳反

疏

注据奔喪以非禮書解云即定

十五年夏五月壬申公薨于高寢下云邾婁子來奔喪傳云其言來奔喪非禮也是○歸含至言來解云下五年春王正月王使榮叔歸含且賵是也

會葬禮也注但解會葬者明

言來者常文不爲早晚施也常事書者文公不肖諸侯莫肯會之故書天子之厚以起諸侯之薄蓋以長

補短也叔服者王子虎也服者字也叔者長幼稱也
不繫王者不以親疏錄也不稱王子者時天子諸侯
不務求賢而專貴親親故尤其在位子弟刺其早任
以權也魯得言公子者方錄異辭故獨不言弟也諸

侯得言子弟者一國失賢輕音義

不爲子僞反下不爲同長丁丈反稱

尺證

疏注但解至施也解云在隱元年也○常事書

反

者解云僖公之卒在去年十二月至今年四

月葬之是爲五月而葬叔服來會附在葬前適得其
所故謂之常事常事不書今書之故須注解○文公
至會之解云正以下七年秋八月公會諸侯晉大夫
盟于扈傳云諸侯何以不序大夫何以不名公失序

也公失序奈何諸侯不可使與公盟眡晉大夫使與公盟也注云文公爲諸侯所薄賤不見序故深諱爲不可知之辭是其不肖諸侯莫肯會之義也○故書至之薄解云言天子恩厚於文公而經書其會葬起諸侯之薄無思於文公故經不書矣而襄三十一年冬十月滕子來會葬亦是常事而書之者亦起當時更無人會故彼注云此書者與叔服同義是也○蓋以長補短也解云謂書天子得禮欲以補諸侯之短令其非禮見矣其非禮者不相會葬是也○叔服至稱也解云知叔服爲王子虎者正以下三年夏五月王子虎卒傳云王子虎者何天子之大夫也外大夫不卒此何以卒新使乎我也注云王子虎卽叔服也新爲王者使來會葬在葬後三年中卒君子恩降於親親則加報之故卒明當有恩禮是也○不繫至錄也解云若繫王宜云王使王服子來會葬似若宣十五年王札子矣今不如此者春秋主見天子之厚

使來會葬而已何須錄其使人之親疏乎是以不言
王服子矣宣十五年王札子殺召伯毛伯傳云王札
子者何長庶之號注云子者王子也天子不言子弟
故變文上札繫先王以明之是其類也○不稱至權
也解云言尤其在位子弟則知聘使與會盟之時不
得稱子弟於其卒與奔猶得稱之何者卒與出奔不
復在位何須刺其早任以權乎卽下三年夏五月王
子虎卒襄三十年夏王子瑕奔晉之屬是也○魯得
至弟也解云魯君在位公子得言之者卽桓三年公
子翬如齊逆女莊二年公子慶父伐於餘丘之屬是
也言方錄異辭者謂上異於天子下異於諸侯見其
爲新王之義故曰方錄異辭矣故獨不言弟也者謂
尤其在位之弟若其卒與出奔不妨有之卽宣十七
年冬公弟叔肸卒之屬是也○諸侯至賢輕解云諸
侯在位公子得見經者卽宣二年春及鄭公子歸生
戰于大棘之屬是也其諸侯在位之弟得見經者卽

隱七年夏齊侯使其弟年來聘桓十四年夏鄭伯使其弟語來盟之屬是也一國失賢輕者雖是不務求賢而專貴親親要其一國失賢其罪輕故也

夏四月丁巳葬我君僖公

天王使毛伯來錫公命音義

錫思歷反

傳錫者何賜也命者何加我服也注復發傳者嫌禮

與桓公同死生異也主書者惡天子也古者三載考

績三考黜陟幽明文公新卽位功未足施而錫之非

禮也音義

復扶又反疏解云明始卽位未有功美天惡烏路反疏子加錫異於常典故執不知

問注復發至禮也解云莊元年王使榮叔來錫桓公
命傳云錫者何賜也注云上與下之辭傳又云命者
何加我服也注云增加其衣服命有異於諸侯然則
若不重發卽嫌悉與桓公同故復言之明有異矣彼
是贈死之衣此是朝祭之服故言
死生異也云云之說在莊元年

晉侯伐衛

叔孫得臣如京師注書者與莊二十五年同知不爲喪
聘書者聘爲貢職天子當得異方之物以事宗廟又欲

以知君父無恙不以喪廢故不譏也如他國就不三年

一譏而已音義

亮反

疏

注書者至譏也解云卽莊二十五年冬公子友如陳彼注云如

陳者聘也。內朝聘言如者尊內也。書者錄內所交接也。今此亦然。故曰同也。○如他至而已。解云如他國所以合譏者。正以聘是吉禮。又非君父之國於喪宜廢故也。言就不三年一譏而已者。卽下二年冬公子遂如齊納幣傳云。納幣不書。此何以書。譏何譏。爾譏喪娶也。娶在三年之外。則何譏乎。喪娶三年之內不圖婚是也。言就其重者一譏而已。其餘不譏從可知。

衛人伐晉

秋公孫敖會晉侯于戚音義

戚午
寂反

冬十月丁未楚世子商臣弑其君髡。注楚無大夫言世子者甚惡世子弑父之禍也不言其父言其君者君之

於世子有父之親有君之尊言世子者所以明有父之親言君者所以明有君之尊又責臣子當討賊也日者夷狄子弑父忍言其日音義髡苦門反疏注楚無至賊左氏作頤年冬楚子使椒來聘傳云椒者何楚大夫也楚無大夫此何以書始有大夫也始有大夫則何以不氏許夷狄者不一而足也然則至下九年楚始有大夫則知此處未有大夫也既無大夫其世子亦未當見故解之○日者至其日解云如此注者正決襄三十年夏四月蔡世子般弑其君固何氏云不日者深爲中國隱痛有子弑父之禍故不忍言其日是也

公孫敖如齊注書者譏喪娶吉凶不相干

二年春王二月甲子晉侯及秦師戰于彭衙秦師敗績

注稱秦師者愍其衆惡其將前以不用賢者之言匹馬

隻輪無反者今復重師敗績師敵君不正者賤之不嫌

得敵君音義

衙音牙本或作牙惡烏路反將子匠疏注反復扶又反下不復皆同重直用反稱

秦至其將解云正以秦于是時未有大夫則不合稱師
今而稱師故解之○前以至敗績解云在僖三十三年
矣○師敵至敵君解云僖二十八年夏晉侯以下及楚
人戰于城濮傳云此大戰也曷爲使微者子玉得臣也
子玉得臣則其稱人何賤大夫不敵君也然則彼是大
夫嫌其與君敵故正之稱人此師者乃是秦之衆人是
以不勞
正之耳

丁丑作僖公主

傳作僖公主者何疏

解云欲言是禮書而譏之欲言非禮禮有作主之事故執不知

問

爲僖公作主也注爲僖公廟作主也主狀正方穿

中央達四方天子長尺二寸諸侯長一尺音義

爲僖于僞

反下蓋爲以爲下欲爲同

疏注主狀至一尺解云皆孝經說文也

云之說備在左氏

主者曷用虞主用桑注禮平明而葬日中

而反虞以陽求陰謂之虞者親喪以下壙皇皇無所親求而虞事之虞猶安神也用桑者取其名與其麤

猶所以副孝子之心禮虞祭天子九諸侯七卿大夫

五士三其奠處猶吉祭音義

壙苦晃反又音曠麤才古反又七奴反

疏

注禮平至反虞解云出檀弓與士虞記也言以陽求陰者謂以日中求神是也而鄭注士虞記云朝葬而日中虞君子舉事必用辰正也者兩相須也彼鄭氏又云再虞三虞皆質明則日中而反虞者指葬日言之○禮虞至吉祭解云自諸侯七以下雜記文其天子九虞者何氏差之耳異義左氏說亦有成文云云之說具左
練主用栗注謂期年練祭也埋虞主於兩氏傳疏

階之間易用栗也夏后氏以松殷人以柏周人以栗松猶容也想見其容貌而事之主人正之意也柏猶

迫也親而不遠主地正之意也栗猶戰栗謹敬貌主

天正之意也禮士虞記曰桑主不文吉主皆刻而諡

之蓋爲禘祫時別昭穆也虞主三代同者用意尚麤

猶未暇別也音義

期音基三年注同正音疏注謂期征下同別彼列反下同至栗也

解云出禮記文○夏后至以栗解云出論語而鄭氏注云謂社主正以古文論語哀公問社於宰我故也

今文論語無社字是以何氏以爲廟主耳

用栗者藏主也注藏于廟室中

堂所當奉事也質家藏于堂作僖公主何以書注据作餘公主不書譏何譏爾不時也其不時奈何欲久

喪而後不能也注禮作練主當以十三月文公亂聖人制欲服喪三十六月十九月作練主又不能卒竟故以二十五月也日者重失禮鬼神疏注禮作至三月解云即禮記云十三月而練是也○日者至鬼神解云即隱五年注云失禮鬼神例日是也

三月乙巳及晉處父盟

傳此晉陽處父也何以不氏注据晉陽處父伐楚救

江疏

注解云即下三年冬晉陽處父帥師伐楚救江是也

諱與大夫盟也注諱

去氏者使若得其君如經言邾婁儀父矣不地者起

公就於晉也日者起公盟也俱沒公齊高侯不使若
君處父使若君者親就其國恥不得其君故使若得
其君也如晉不書不致者深諱之音義去起疏注諱呂反
晉也解云儀父之事在隱元年凡五等諸侯失爵在
名字之例者但直書其名字不言其氏即倪黎來祭
叔邾婁儀父之類是也今此處父無氏故云使若得
其君矣○日者起公盟也解云正以微者盟例不日
故也○俱沒至君也解云高侯之事在莊二十二年
彼經云秋七月丙申及齊高侯盟于防是也○如晉
至諱之解云正決下三年冬公如晉十有二月
己巳公及晉侯盟四年春公至自晉之文也

夏六月公孫教會宋公陳侯鄭伯晉士穀盟于垂飲音

義穀戶木反垂欽

左氏作垂隴

注盟不日者欲共盟誅商臣雖不能

誅猶爲疾惡故也褒與信辭也不如平丘兩舉會盟詳

錄之者時至即盟會禮不成疏

注雖不能誅解云正以共討惡逆乃是義之高

者若能誅之理應書見似若昭四年經書執齊慶封殺之然今無其經故知不能誅也○不如至不成解云即昭十三年公會劉子晉侯以下于平丘八月甲戌同盟於平丘是也

自十有二月不雨至于秋七月

傳何以書記異也注以不言旱大旱以災書此亦旱

也曷爲以異書大旱之日短而云災注云言也言有

災疏

大旱以災書解云即僖二十一年經書夏大旱傳云何以書記災也是也

故以災書

此不雨之日長而無災故以異書也注此祿去公室

政在公子遂之所致也不就莊三十一年發傳者此

最甚事著疏

注不就至事著解云莊三十一年冬不雨傳云何以書記災也然則彼一時不

雨是以不得發傳云不雨之日長此則歷四時故言最甚事著也

八月丁卯大事于大廟躋僖公音義

大廟音泰下大祖皆同躋子兮反升

也本又作躋同

傳大事者何疏

解云欲言大祭無禘祫之文欲大祫言時祭而經書大故執不知問

也注以言大與有事異又從僖八年禘數之知爲大

禘音義

禘音洽禘大帝反數所主反

疏

注以言至事異解云宣八年夏六月辛巳有事于大

廟彼是時祭不言大則知此言大者是大祭明矣○又從僖至大禘解云春秋說文云三年一禘五年一禘爾雅云禘大祭也孫氏云禘五年大祭也然則三年一禘五年一禘禮如然也案僖八年秋七月禘於大廟從此以後三年一禘數則十一年禘十四年禘十七年禘二十年禘二十三年禘二十六年禘二十九年禘三十二年禘文二年禘也若作五年一禘數則從僖公八年禘十三年禘十八年禘二十三年禘二十八年禘三十三年禘文五年禘則文二年非禘年正當合禘故知此年大事爲禘矣是以注云又從僖八年禘數之知爲大禘也若然從僖八年禘數之則十一年禘十三年禘隨次而下至僖二十三年并

爲禘祫何得下傳云五年而再殷祭者蓋爲其初時
三年作祫五年作禘大判言之得言五年而再殷祭
其間三五參差隨次而下何妨或有同年時乎知非
祫與禘相因而數爲三年五年者若從僖八年禘十
一年祫十六年禘十九年祫數之至僖三十二年禘
文公二年祫亦相當但於五年而再殷祭之言不合
故不
得然
大祫者何疏
解云正以祫小于禘而
合祭也其
文加大故執不知問

合祭奈何毀廟之主陳于大祖注毀廟謂親過高祖
毀其廟藏其主于大祖廟中禮取其廟室筭以爲死
者炊沐大祖周公之廟陳者就陳列大祖前大祖東
鄉昭南鄉穆北鄉其餘孫從王父父曰昭子曰穆昭

取其鄉明穆取其北面尚敬音義

祭側白反炊昌垂反沐音木鄉許亮

反

疏

注禮取至炊沐解云出禮記文

未毀廟之主皆升合食于太祖

注自外來曰升五年而再殷祭注殷盛也謂三年祫

五年禘禘所以異於祫者功臣皆祭也祫猶合也禘

猶禘也審禘無所遺失禮天子特禘特祫諸侯禘則

不祫祫則不嘗大夫有賜於君然後祫其高祖音義

諦音帝祫

疏

注禘所以至皆祭也解云出禮記與春羊略反秋說文○禮天至特祫解云禮記及春

秋說文即不主禘祫是也○諸侯至不嘗解云即禮記王制所云夏禘則不祫秋祫則不嘗是也○大夫

至高祖解云正以於禮不得故也

躋者何疏

解云先君昭穆自有常次今而言躋故執不知

問

升也何言乎升僖公注据禘于大廟不道所升疏

注据禘至所升解云即僖八年秋七月禘于大廟用致夫人是也

譏何譏爾逆祀也

其逆祀奈何先禘而後祖也注升謂西上禮昭穆指

父子近取法春秋惠公與莊公當同南面西上隱桓

與閔僖亦當同北面西上繼閔者在下文公緣僖公

於閔公爲庶兄置僖公於閔公上失先後之義故譏

之傳曰後祖者僖公以臣繼閔公猶子繼父故閔公

於文公亦猶祖也自先君言之隱桓及閔僖各當爲
兄弟顧有貴賤耳自繼代言之有父子君臣之道此
恩義逆順各有所施也不言吉祿者就不三年不復
譏略爲下張本音義補乃疏注不言至張本解云閔
禮反二年夏五月乙酉吉禘
于莊公傳云其言吉何言吉者未可以吉也曷爲未
可以吉未三年也然則吉禘于莊公在三年之內今
此大事亦在三年之內是不須更言吉祿以譏
之但略言大事于大廟爲下躋僖公張本而已

冬晉人宋人陳人鄭人伐秦

公子遂如齊納幣

傳納幣不書疏

解云正以桓三年秋公子翬如齊逆女不書納幣故難之此何以

書譏何譏爾譏喪娶也娶在三年之外則何譏乎喪

娶注据逆在四年音義

娶七住反本亦作取同

三年之內不圖

婚注僖公以十二月薨至此未滿二十五月又禮先

納采問名納吉乃納幣此四者皆在三年之內故云

爾吉禘于莊公譏然則曷爲不於祭焉譏注据吉禘

于莊公譏始不三年大事圖婚俱不三年大事猶從

吉禘不復譏三年之恩疾矣注疾痛非虛加之也注

非虛加責之以人心爲皆有之注以人心爲皆有疾
痛不忍娶以人心爲皆有之則曷爲獨於娶焉譏注
据孝子疾痛吉事皆不當爲非獨娶也娶者大吉也

注合二姓之好傳之於無窮故爲大吉音義

好呼報反傳直

專反非常吉也注與大事異其爲吉者主於已注主於

已身不如祭祀尚有念先人之心以爲有人心焉者
則宜於此焉變矣注變者變慟哭泣也有人思念親
者聞有欲爲已圖婚則當變慟哭泣矣况乃至子納

幣成婚哉音義

慟杜貢反

三年春王正月叔孫得臣會晉人宋人陳人衛人鄭人

伐沈沈潰音義

沈音審國名潰戶內反

夏五月王子虎卒

傳王子虎者何疏

解云欲言大夫例不書卒欲言諸侯而經書王子故執不知問

天

子之大夫也外大夫不卒此何以卒注据原仲也疏

注解云即莊二十七年秋公子友如陳葬原仲是也

新使乎我也注王子虎即

叔服也新爲王者使來會葬在葬後三年中卒君子

恩隆於親親則加報之故卒明當有恩禮也尹氏卒

日此不日者在期外也名者卒從正音義

使所疏注

氏至外也解云隱三年夏四月辛卯尹氏卒下傳云外大夫不卒此何以卒天王崩諸侯之主也何氏云時天王崩魯隱往奔喪尹氏主饋贊諸侯與隱交接而卒恩隆於王者則加禮錄之故爲隱思痛之日者恩錄之明當有恩禮然則彼天王崩尹氏四月卒仍在期內其思近故書日此則已經三年其思殺故不日是以注云在期外○名者卒從正解云隱八年夏六月己亥蔡侯考父卒八月葬蔡宣公傳云卒從正何氏云卒當赴告天子君前臣名故從君臣之正義言也傳云而葬從主人何氏云至葬者有常月可知不赴告天子故自從蔡臣子辭稱公然則此亦從君臣之正義言之故云名者卒從正也

秦人伐晉

秋楚人圍江

雨蝨于宋音義

雨于付反傳及注同
一音如字蝨音終

傳雨蝨者何疏

解云欲言是雨而特施于蝨欲言
非雨而文言雨蝨故執不知問

死

而墜也注以先言雨也墜隋地也不言如雨言雨蝨

者本飛從地上而下至地似雨尤醇音義

墜直類反
注同隋大

果反上時掌
反醇音純

疏

注以先言雨也解云正以先言雨後
言蝨則知死而墜者也○不言至尤

醇解云欲道莊七年星賁如雨者本從天來又不及
地如雨不醇故云如雨此則初從地上而還至地故

不言如言其
真似雨也

何以書記異也外異不書此何以書爲

王者之後記異也注螽猶衆也衆死而墜者羣臣將

爭彊相殘賊之象是後大臣比爭鬪相殺司城驚逃

子哀奔亡國家廓然無人朝廷久空蓋由三世內娶

貴近妃族禍自上下故異之云爾音義

爲于偽反近
附近之近

疏注是後至相殺解云即七年夏宋人殺其大夫八

年冬宋人殺其大夫是也○司城驚逃解云即八

年冬宋司城來奔是也○子哀奔亡解云十四年秋

宋子哀來奔是也○蓋由三世內娶解云僖二十

年及十七年傳皆云宋三世無

大夫三世內娶也之屬是也

冬公如晉十有二月己巳公及晉侯盟

晉陽處父帥師伐楚以救江

傳此伐楚也其言救江何注据兩之當先言救也非

兩之當重出處父也生事當言遂三者皆違例知後

言救江起伐楚意故問之音義

重直疏注据兩至救用反

二十五年秋楚人圍陳納頗子于頗傳云何以不言

遂兩之也是也必知先言救者正以其江近楚遠故

也○非兩至父也解云即僖二十八年春晉侯侵曹

晉侯伐衛傳云曷爲再言晉侯非兩之也是也○生

事當言遂解云即宣元年秋爲諼也注諼詐音義

諼許

元反其爲諼奈何伐楚爲救江也注救人之道當指其所之實欲救江而反伐楚以爲其勢必當引圍江兵當還自救也故云爾孔子曰自古皆有死民無信不立

四年春公至自晉

夏逆婦姜于齊疏

解云隱二年注云不親迎例月重錄之今此書時者蓋以娶于大夫賤不

可以奉宗廟故畧之

傳其謂之逆婦姜于齊何注据不書逆者主名不言

如齊不稱女疏

注解云決宣元年公子遂如齊逆女之經也

畧之也注稱

婦姜至文也逆與至共文故爲畧疏

注解云欲道遂以夫人婦姜至

自齊之經還至始言婦姜今此始逆已言婦姜故云逆與至共文耳

高子曰娶乎大夫

者畧之也注賤非所以奉宗廟故畧之不書逆者主

名卑不爲錄使也不言如齊者大夫無國也不稱女

者方以婦姜見與至共文重至也不稱夫人爲致文

者賤不可奉宗廟也不言氏者本當稱女女者父母

辭君子不奪人之親故使從父母辭不言氏音義爲于

偽反使所使疏注不言至言氏解云莊二十七年秋反見賢徧反疏公子友如陳葬原仲案彼亦是大夫無國而得言如陳者何氏云不言如陳嫌不辟國事實私行也是也

狄侵齊

秋楚人滅江

晉侯伐秦

衛侯使甯俞來聘音義

甯乃定反俞音餘

疏

解云正本作速字故賈氏云公羊曰

甯速是也

冬十有一月壬寅夫人風氏薨

五年春王正月王使榮叔歸含且賵

傳含者何疏

解云欲言實口上下無制欲言

口實也

注孝子所以實親口也緣生以事死不忍虛其口天

子以珠諸侯以玉大夫以碧士以貝春秋之制也文

家加飯以稻米音義

飯扶晚反疏注天子至以貝解云皆

制也○文家加飯以稻米解云即禮記檀弓下篇云飯用來貝弗忍虛也

其言歸含且賵

何注据宰咺歸兩賵不言且也連賵何之者嫌据賵

言歸音義

阮况反疏注据宰至且也解云即隱元年秋七月天王使宰咺來歸惠公仲子

之贈是也○連贈至言歸解云若傳直言其言且兼
何即嫌責此贈事亦當言歸故連言贈以辯嫌

之兼之非禮也注且兼辭以言且知幾兼之也含言

歸者時主持含來也去天者含者臣子職以至尊行

至卑事失尊之義也不從含晚言來者本不當含也

主書者從含也音義

去起呂疏反下同

疏注含者臣子職解云正以大宰掌之故也

○不從至含也解云正以含者殯前之禮遙始行之
故知晚然則宜言來以見晚而不言來者正以本不
當含寧得責其晚乎○主書至含也解云言春秋
主書此事者正欲譏其含而并言且贈者因譏之

三月辛亥葬我小君成風

傳成風者何疏

解云欲言其妾經書小君欲言夫人不同夫諡故執不知問

僖公

之母也注風氏也任宿顓臾之姓音義

任音壬顓音榆

疏

注風氏至之姓解云風氏謂此成風即上文風氏薨者矣知任宿等之姓者左傳文

王使召伯來會葬注去天者不及事刺比失喪禮也

夏公孫敖如晉

秦人入郛音義

郛音弱

秋楚人滅六疏

解云不月者畧夷狄滅小國也說在僖二十六年

冬十月甲申許男業卒疏

解云正本作卒字

六年春葬許僖公

夏季孫行父如陳

秋季孫行父如晉

八月乙亥晉侯謹卒

音義謹好官反

冬十月公子遂如晉葬晉襄公注書遂者刺公生時數

如晉葬不自行非禮也禮諸侯薨使大夫弔自會葬音

義

數所疏注解云晉侯生時公數如晉者即上二年三

角反月乙巳及晉處父盟彼下注云如晉不書不

致者深諱之三年冬公如晉之屬是也言葬不自行非
禮云云者異義公羊說云襄三十年叔弓如宋葬宋共

姬譏公不自行也者與此注合

晉殺其大夫陽處父晉狐射姑出奔狄音義

射音亦又音夜穀梁

夜作

傳晉殺其大夫陽處父則狐射姑曷爲出奔注据蔡

殺其大夫公子燮蔡公子履出奔楚此非同姓恐見

及疏

注解云事在襄二十年秋彼則履是燮之同姓言恐禍及已而出奔此非同姓而亦奔故難之

射姑殺也注以非恐見及知其殺射姑殺則其稱國

以殺何君漏言也注自上言泄下曰漏音義

漏力豆反泄也

泄息列反
又以制反

其漏言奈何君將使射姑將注謂作中軍

大夫音義

將子匠反下同

陽處父諫曰射姑民衆不說不可

使將於是廢將陽處父出射姑入君謂射姑曰陽處

父言曰射姑民衆不說不可使將射姑怒出刺陽處

父於朝而走注明君漏言殺之當坐殺也易曰君不

密則失臣臣不密則失身幾事不密則害成音義

說音

悦下同刺七亦反
又一音七賜反

疏

注明君至殺也解云襄公當坐例去其葬而上文經書冬十

月公子遂如晉葬襄公者蓋謂葬訖乃相殺不得追
去葬是以穀梁傳曰襄公死處父主竟上之事夜姑

使人殺之是也然則此傳雖連言之仍不妨殺之在
葬後是以經書葬在殺前矣○易曰君不密至則害
成解云上繫辭文也鄭氏云幾微也密靜
也言不慎于微而以動作則禍變必成

閏月不告月猶朝于廟

傳不告月者何疏

解云欲言朔日文不言朔欲言非朔刺其不告故執不知問

不

告朔也注禮諸侯受十二月朔政於天子藏于大祖

廟每月朔朝廟使大夫南面奉天子命君北面而受

之比時使有司先告朔謹之至也受於廟者孝子歸

美先君不敢自專也言朝者緣生以事死親在朝朝

莫夕已死不敢溲鬼神故事必於朔者感月始生而

朝音義

大音泰比必利反朝朝上疏注禮諸侯至受如字下直遙反溲息列反疏之解云出玉藻

但謂禮法然非謂禮有成文○比時至告朔解云比時者言比至月初之時也○親在朝朝莫夕解云據禮有朝立端夕深衣之文故也而文王世子云文王之爲世子朝于王季日三者蓋謂越禮之高矣曷

爲不告朔注據具月也天無是月也閏月矣何以謂之天無是月非常月也注所在無常故無政也猶者

何疏

解云欲言非禮禮則有之欲言是禮而經書猶故執不知問

通可以已也注

朝者因視朔政爾無政而朝故加猶不言朔者閏月

無告朔禮也不言公者內事可知疏

注不言至可知解云欲道下十

六年夏五月公四不視朔言公矣故解之

七年春公伐邾婁

三月甲戌取須朐音義

朐其俱反

傳取邑不曰此何以曰注据取叢也疏

注解云考諸舊本叢皆作

闕字是以昭三十二年春王正月取闕傳云闕者何邾婁之邑也若作叢字即僖三十三年夏四月辛巳

晉人及姜戎敗秦于殽癸巳葬晉文公狄侵齊公伐邾婁取叢文承日月之下而將取邑不曰據之非其

義也且案彼叢字多作鄒字耳內辭也使若他人然注使若公春伐

邾婁而去他人自以甲戌日取之內再取邑然後甚
而日也今此一取而日故使若他人然所以深諱者

扈之盟不見序并爲取邑故音義

爲于僞反疏注內
年末注同再至

日也解云即隱十年夏六月辛未取郕辛巳取防傳
云取邑不日此何以日一月而再取也何言乎一月
而再取甚之也是也若然哀二年春王二月季孫斯
叔孫州仇仲孫何忌帥師伐邾婁取鄆東田及沂西
田亦是再取邑而不日者隱公之時新王始起當先
自正而比取人邑小惡之甚者書日以甚之至定哀
之時久致大平內之小惡亦諱而不書是以不書其
日矣所以不全諱之者如彼注云○今此至人然解
云舊本故下有知字○扈之至邑
故解云扈之盟在下文秋八月

遂城邵注主書者甚其生事困極師衆音義

部音

夏四月宋公王臣卒注不書葬者坐殺大夫也不日者

內娶略疏

注不書至夫也解云正以僖二十四年宋公王臣即位至二十五年夏宋殺其大夫而不

書葬明其坐此故也○不日至娶畧解云正決僖九年春王三月丁丑宋公禦說卒書丁丑故也

宋人殺其大夫

傳何以不名注据宋殺其大夫山名疏

注解云即成十五年秋宋

殺其大夫山是也

宋三世無大夫三世內娶也注故使無大

夫疏

解云僖二十五年傳云宋三世無大夫三世內娶也注云三世謂慈父王臣處白也內娶大夫

女也言無大夫者禮不臣妻之父母國內皆臣無娶道故絕去其大夫名正其義也是也然則彼已有傳今復發之者恐大夫不書名更有佗義故明之其有佗義者即莊二十六年夏曹殺其大夫傳云何以不名衆殺之類是耳

戊子晉人及秦人戰于令狐音義令力反晉先昧以師奔

秦音義

昧音蔑左氏作蔑

疏

晉先昧解云左氏穀梁作先蔑

傳此偏戰也何以不言師敗績注据秦師敗績疏

解注

云即上二年春王二月甲子晉侯及秦師戰于彭衙秦師敗績是也敵也注俱無勝負

此晉先昧也其稱人何注据奔無出文知先昧也貶

曷爲貶注据新築之戰衛孫良夫敗績不貶疏

注解云即

成二年夏衛孫良夫帥師及齊師戰于新築衛師敗績是也

外也其外奈何以師

外也注懷持二心有功欲還無功便持師出奔故於

戰貶之起其以師外也本所以懷持二心者其咎亦

由晉侯要以無功當誅也不起者敵而外事可知也

音義

咎其疏注不起至知也解云言所以不申作文九反起見晉侯要以無功當誅之義者以其

可知何以不言出注据楚囊瓦俱戰而奔言出疏

注解

云即定四年冬蔡侯以吳子及楚人戰于伯莒楚師敗績楚囊瓦出奔鄭也以此言之則令狐非晉地伯

莒爲楚地明矣遂在外也注起其生事成於竟外從竟外去

狄侵我西鄙

秋八月公會諸侯晉大夫盟于扈

傳諸侯何以不序大夫何以不名注序次也据新城

盟諸侯序趙盾名疏

注解云即下十四年夏六月公會宋公陳侯以下晉趙盾癸酉

同盟于新城是

公失序也公失序奈何諸侯不可使與公盟

眅晉大夫使與公盟也注以目通指曰眅文公內則

欲久喪而後不能喪娶逆祀外則貪利取邑爲諸侯

所薄賤不見序故深諱爲不可知之辭不日者順諱

爲善文也音義

以目通指曰眖本又作眖伊乙反又大結反

云眖眖也

疏注

以目通指曰眖解云言其用目眖之以忍反而并指向魯若今時瞬眼矣○文公至

不能解云即上二年二月丁丑作僖公主傳云何以

書譏何譏爾不時也其不時奈何欲久喪而後不能

是也○喪娶逆祀解云其喪娶即二年冬公子遂如

齊納幣傳云何以書譏喪娶是也其逆祀即二年秋

大事于太廟躋僖公傳云何譏爾逆祀也者是也而

先引喪娶者正以納幣之前仍有數禮不妨在大事

之前故見之○外則貪利取邑解云即上春公伐邾

婁取須朐是也○不日至文也解云正以日爲不信

辭故也

冬徐伐莒注謂之徐者前共滅王者後不知尊先聖法

度今自先犯文對事連可以起同惡莒在下不得狄故

復狄徐也一罪再狄者明爲莒狄之爾徐先狄在僖十

五年音義

復扶又反

疏

注謂之至同惡解云即僖十四年春諸侯城緣陵傳曰孰城之

城杞也曷

爲城杞滅也孰滅之蓋徐莒脅之是也言不知尊先聖法度者謂杞有禹法度也○莒在至徐也解云謂莒時被伐例不得出主名是以無由狄之○徐先至五年解云即僖十五年冬楚人敗徐于婁林彼注云謂之徐者爲滅杞不知尊先聖法度惡重故狄之也是也

公孫敖如莒莅盟

八年春王正月

夏四月

秋八月戊申天王崩

冬十月壬午公子遂會晉趙盾盟于衡雍

音義雍於用反

乙酉公子遂會伊雒戎盟于暴注四日不能再出不卒

名者非一事再見也音義

雒音洛暴步報反本又作疏曝一音甫沃反見賢遍反

注解云欲道宣元年公子遂如齊三月遂以夫人婦姜至自齊傳云遂何以不稱公子一事而再見者卒名也注云卒竟也竟但舉名者省文者言彼是一事再見故得省文與此異也

公孫敖如京師不至復丙戌奔莒

傳不至復者何疏

解云欲言不到經有如文欲言實到復有不至之稱故執不知問

不至復者內辭也不可使往也注安居不肯行故諱

使若已行但不至還爾即已行當道所至乃言復如

至黃矣疏

注即已至黃矣解云即宣八年夏六月公子遂如齊至黃乃復是也

不可使

往則其言如京師何遂公意也注正其義不使君命

壅塞音義

壅於勇反

何以不言出注据慶父言出奔疏

注

云即上閔二年九月公

子慶父出奔莒是也遂在外也注諱使若從外來

不敢復還者也日者嫌赦罪明則起君弱故諱使若

無罪音義

復扶又反

疏

注日者至無罪解云閔二年九月公子慶父出奔莒彼注云不日者

內大夫奔例無罪者日有罪者月是也故此作注云日者使若無罪矣內大夫奔例日者襄二十三年冬十月乙亥臧孫紇出奔邾婁之屬是也

螻注先是公如晉公子遂公孫敖比出不可使勢奪於

大夫煩擾之應音義

終

疏

注解云公子遂不可使者即僖三十年冬公子遂如

京師遂如晉傳云大夫無遂事此其言遂何公不得爲政爾注云不從公政令也時見使如京師而橫生事矯君命聘晉故疾其驕蹇自專當絕之者是

宋人殺其大夫司馬

宋司城來奔

傳司馬者何疏

解云欲言大夫例不官舉欲言非大夫而經有大夫之文故執不知問

司城者何疏

解云欲言大夫例不官舉欲言非大夫司城者宋大夫之號故執不知問皆

官舉也注皆以官名舉言之天子有大司徒大司馬

大司空皆三公官名也諸侯有司徒司馬司空皆卿

官也宋變司空爲司城者辟先君武公名也疏

注宋變至

武公名也解云桓六年左氏傳文

曷爲皆官舉注据宋殺其大夫山

不官舉疏注解云即在成十五年秋宋三世無大夫三世內娶也

注宋以內娶故威勢下流三世妃黨爭權相殺司城

驚逃子哀奔亡主或不知所任朝廷久空故但舉官

起其事也大夫相殺例皆時疏注子哀奔亡解云即下十四年宋子哀來

奔是也○大夫相殺例皆時解云正以此經及下九年晉人殺其大夫先都晉人殺其大夫士穀之屬皆不別書日月故也知彼此是大夫相殺之經者正以下十六年傳云大夫相殺稱人矣

九年春毛伯來求金

傳毛伯者何疏

解云欲言諸侯經不書朝欲言大夫又不言使故執不知問

天子

之大夫也何以不稱使注据南季稱使疏

注解云即隱九年春

天王使南季來聘是

當喪未君也注時王新有三年喪疏

注解云即

去年八月天王崩是也

踰年矣何以謂之未君注据崩在八年

踰年當即位即位矣而未稱王也未稱王何以知其

即位以諸侯之踰年即位亦知天子之踰年即位也

注俱繼體其禮不得異以天子三年然後稱王亦知

諸侯於其封內三年稱子也注各信恩於其下音義

申信音踰年稱公矣則曷爲於其封內三年稱子緣民

臣之心不可一日無君緣終始之義一年不二君注

故君薨稱子其既葬稱子明繼體以繫民臣之心疏

踰年稱公解云莊三十二年師解云爾故據難之

不可曠年無君注故踰年

稱公緣孝子之心則三年不忍當也注孝子三年志

在思慕不忍當父位故雖即位猶於其封內三年稱

子子張曰書云高宗涼闇三年不言何謂也孔子曰

何必高宗古之人皆然君薨百官總己以聽冢宰三

年音義

涼音亮又音良闇如字又音陰

毛伯來求金何以書譏何譏

爾王者無求求金非禮也然則是王者與注据未稱

王音義

與音餘

曰非也非王者則曷爲謂之王者王者

無求曰是子也注雖名爲三年稱子者其實非唯繼

父之位繼文王之體守文王之法度文王之法無求

而求故譏之也注引文王者文王始受命制法度

夫人姜氏如齊注奔父母之喪也不言奔喪者尊內猶

不言朝聘也故以致起得禮也書者大夫家危重言如

齊者大夫繫國疏

注奔父母之喪也解云知者正以諸侯夫人尊重既在夫家終身不反唯

三年之喪乃可越竟而奔之今此夫人如齊直書不諱故知其奔父母之喪也○故以致起得禮也解云正以春秋之例夫人違禮而出會者皆不致之唯此一文而書至故莊元年注云有出道乃致奔喪致是也○書者至危重解云欲道夫人如齊奔父母之喪禮既許之則是常事而書之者但此夫人所適乃是大夫之家卑于夫人有不制之義而危重之是以書也○言如齊至繫國解云案上四年逆婦姜之下注云不言如齊者大夫無國也與此違者正以四年經云夏逆婦姜于齊逆至共文又不書如齊見其娶于大夫矣故不言如齊正由大夫無國故也今此夫人仍彼婦姜一也經書如齊明知正由大夫繫國故也何者今既尊內不言奔喪若去如齊即文不可施是以將大夫繫國書如齊矣

二月叔孫得臣如京師

辛丑葬襄王

傳王者不書葬此何以書不及時書過時書注重錄

失時疏

解云正以隱三年天王崩之下師作解云天子記崩不記葬必其時也故此弟子據而難

之其不及時書者即宣二年十月天王崩三年正月葬匡王昭二十二年夏四月乙丑天王崩六月叔鞅如京師葬景王之屬是也以其不及七月故書之也其過時書者上下無文唯桓十五年三月乙未天王崩至莊三年夏五月葬桓王蓋以當之注重錄失時解云以天下共葬一人而不如禮故重錄之刺其失矣

時我有往者則書注謂使大夫往也惡文公不自往

故書葬以起大夫會之日者僖公成風之喪襄王比

加禮故恩錄之所以甚責內音義

惡烏疏注日者至路反責內解云

如此注者正以昭二十二年六月叔鞅如京師葬景王之屬不日故也言襄王比加禮者即元年叔服來會葬五年榮叔歸含且賵召伯來會葬之屬是也

晉人殺其大夫先都

三月夫人姜氏至自齊注出獨致者得禮故與臣子辭

月者婦人危重從始至例疏

注出獨至子辭解云書致者臣子喜其脫危而致故

曰與臣子辭耳○月者至始至例解云獨行無制恐有非禮之惡故曰危重也言從始至例者即宣元年三月

遂以夫人婦姜至自齊成十四年九月

僑如以夫人婦姜氏至自齊之屬是也

晉人殺其大夫士穀及箕鄭父

楚人伐鄭

公子遂會晉人宋人衛人許人救鄭

夏狄侵齊

秋八月曹伯襄卒

九月癸酉地震

傳地震者何疏

解云太陰沉重本無動性而書震故執不知問

動地也注動

者震之故傳先言動者喻若物之動地以曉人也何

以書記異也注天動地靜者常也地動者象陰爲陽
行是時魯文公制於公子遂齊晉失道四方叛德星
孛之萌自此而作故下與北斗之變所感同也不傳

天下異者從王內錄可知音義

行下孟反
李音佩

疏

注星孛
至同也

解云即十四年秋七月有星孛入于北斗是也言與
北斗之變所感同者即十四年注云齊晉竝爭吳楚
更謀競行天子之事齊宋莒魯弑其君而立之應是
也○不傳至可知解云僖十四年秋八月辛卯沙鹿
崩傳云何以書記異也外異不書此何以書爲天下
記異也今此地震爲內錄之內爲新王天下明矣故
言不傳天下異者
從王內錄可知

冬楚子使椒來聘音義

椒子遙反一本作荻子小反

傳椒者何疏

解云欲言大夫不言其氏欲言微者書名見經故執不知問

楚大夫

也楚無大夫此何以書始有大夫也注入文公所聞

世見治升平內諸夏以外夷狄也屈完子玉得臣者

以起霸事此其正也聘而與大夫者本大國音義

見賢

徧疏

注入文至升平解云知文公爲所聞之世者春秋說云文宣成襄所聞之世是也言見治升平

者升進也

欲見其治稍稍上進而至于平也○內諸

夏外夷狄解云即成十五年冬叔孫僑如會晉士燮

以下會吳于鍾離傳云曷爲殊會吳外吳也曷爲外也春秋內其國而外諸夏內諸夏而外夷狄是也○

屈完至霸事解云僖四年夏楚屈完來盟于師盟于召陵傳曰屈完者何楚大夫也何以不稱使尊屈完也曷爲尊屈完以當桓公也何氏云增倍使若得其君以醇霸德成王事也是也其子玉得臣者即僖二十八年夏楚殺其大夫得臣何氏云楚無大夫其言大夫者欲起上楚人本當言子玉得臣所以詳錄霸事是也然則彼二人皆是傳聞之世未合書之而書之者欲起齊桓晉文霸事故也○此其正至大國解云等是夷狄而舒越之屬皆無大夫而楚得有大大夫者正以本是大國故入所聞之世於是見法矣始有大夫則何以不氏注据屈完氏許夷狄者不一而

足也注許與也足其氏則當純以中國禮貴之嫌夷

狄質薄不可卒備故且以漸音義

辛七
忽反

秦人來歸僖公成風之祿音義

祿音遂贈喪之衣服

傳其言僖公成風何兼之兼之非禮也注禮主于敬

當各使一使所以別尊卑音義

一使所吏反別彼列反下同

疏言

僖公成風之祿何解云欲言非禮禮有祿文欲言是禮而二人并致故執不知問

曷爲不言

及成風注据及者別公夫人尊卑文也連成風者但

問尊卑體當絕非欲上成風使及僖公音義

上時掌反又如

字

疏注据及至文也解云即僖十一年夏公及夫人姜氏會齊侯于陽穀是也

成風尊也

注不可使卑及尊也母尊序在下者明婦人有三從

之義少繫父既嫁繫夫夫死繫子音義少詩召反

葬曹共公音義恭共音

春秋公羊傳注疏卷十三

春秋公羊傳卷十三考證

二月癸亥朔日有食之注楚滅江六䟽即下四年秋楚人滅江五年秋楚人滅六是也○監本脫江五年秋楚人滅七字臣浩按滅六非四年秋事注言楚滅江六不應但解滅六不解滅江今從閣本添補

天王使叔服來會葬傳會葬禮也注常事書者文公不肖諸侯莫肯會之故書天子之厚以起諸侯之薄○劉敞曰何休說非也文公始即位亦有何不肖而諸

侯遂聞之乎向若天子不遣叔服則春秋便都無文以見文公之不肖矣又云叔服不稱王子亦非也天子之子稱王子猶諸侯之子稱公子王子有封國爲諸侯者不復稱王子以爵爲重其未命爲諸侯者自當從大夫之制或名或字理適宜之非爲刺親親也凡此諸說公羊本無其說出何休耳

晉侯及秦師戰于彭衙秦師敗績注䟽大夫不敵君也
○監本大夫上行故字今去

作僖公主○

臣浩

按他廟作主不書此書蓋將躋僖公

也

傳注主狀正方穿中央達四方天子長尺二寸諸侯長

一尺疏備在左氏○

臣召南

按左氏不言主之形狀

尺寸制度又以爲祔而作主更無用桑用栗之分不知疏謂備在左氏何也

傳練主用栗注夏后氏以松殷人以柏周人以栗疏正以古文論語哀公問社於宰我故也○

臣召南

按杜

預注作主亦用殷人以柏周人以栗二句孔疏曰論語哀公問主於宰我宰我對曰云云先儒舊解或有以爲宗廟主者故杜依用之古論語及孔鄭皆以爲社主据此疏及左傳疏則今文論語應作哀公問主於宰我矣

大事于太廟躋僖公傳先禰而後祖也注僖公以臣繼閔公猶子繼父故閔公於文公亦猶祖也○

臣召南

按公羊此義極精何氏注亦最當後漢梁太后欲以

殤帝廟次居順帝下周舉議曰春秋魯閔公無子庶兄僖公代立其子文公遂躋僖于閔上孔子譏之書曰躋僖公傳曰逆祀也及定公正其序經曰從祀先公爲萬世法也今殤帝在先於秩爲父順帝在後于親爲子先後之義不可改昭穆之序不可亂太后從之此事足與傳相發明

公子遂如齊納幣傳譏喪娶也○王應麟困學紀聞曰公羊之言天理民彝之正也左氏以爲禮以爲孝其

害教最甚杜預謂諒闇既終嘉好之事通於內外其悖理又甚焉又閻若璩曰公羊長於左氏此其一端也

王使召伯來會葬注去天者不及事○劉敞曰天子使人會葬侯國而有早晚小失耳何至遂貶去天乎臣

召南

按榮叔歸含贈召伯會葬皆但稱王程子曰天子成妾母爲夫人亂倫之甚失天理矣不稱天義已明此說較正公羊執母以子貴之說故疑含贈不可

兼何休乃謂會葬不及事皆遁辭耳

公子遂如晉葬晉襄公注書遂者刺公生時數如晉葬
不自行非禮也○臣照按鄰國之喪無國君親行會
葬之禮何氏云云妄說也劉敞已嘗糾之

閏月不告月猶朝于廟傳通可以已也○劉敞曰公羊
以不告朔爲禮以猶朝于廟爲非禮非也閏雖無常
而政有常焉得不告如閏十二月者必有立春立春
之政所當告也臣召南按公羊以猶三望例猶朝于

廟此其所以失也謂天無是月是何言歟公羊不如左氏此亦其一端也

晉人及秦人戰于令狐晉先昧以師奔秦○

臣呂南

按

左氏穀梁經作晉先蔑奔秦無以師二字公羊經有之故傳作以師外解釋文未及注

公會諸侯晉大夫盟于扈傳眖晉大夫使與公盟也○劉敞曰在會者皆諸侯也既與公盟矣又何云眖晉大夫乎且諸侯不欲與魯侯盟乃敢眖晉大夫使之

盟乎此事之不然者也

春毛伯來求金傳以天子三年然後稱王亦知諸侯於

其封內三年稱子也○

臣召南

按此傳則諸侯於國

內紀元曉然矣猶謂必王者然後改元不自相矛盾乎

傳踰年稱公矣疏莊三十二年師解云爾○

臣浩

按監

本作二十年閏本作三十年皆誤也今改正

楚子使椒來聘傳始有大夫也○

臣召南

按列國以名

見者皆大夫也僖四年屈完來盟于師二十一年使
宜申來獻捷二十八年殺其大夫得臣明書于經而
以爲始有大夫此何說也

又注入文公所聞世見治升平○見治升平監本訛
作見升平法今依閣本改正

春秋公羊傳卷十三考證

欽定四庫全書薈要卷一千二百十八

經部

春秋公羊傳注疏卷十四

起文公十年
盡十八年

漢何休學

唐陸德明音義

文公

十年春王三月辛卯臧孫辰卒

夏秦伐晉注謂之秦者起令狐之戰敵均不敗晉先昧以師奔秦可以足矣而猶不知止故夷狄之

楚殺其大夫宜申

自正月不雨至于秋七月注公子遂之所招

及蘇子盟于女栗音義

女音汝本亦作汝

冬狄侵宋

楚子蔡侯次于屈貉注魯恐故書刺微弱也音義

屈貉居勿

反又音厥下音麥又戶各反二傳作厥貉

十有一年春楚子伐園音義

園求阮反一音卷說文作園字林曰萬反二傳作廩

夏叔彭生會晉卻缺于承匡

秋曹伯來朝

公子遂如宋

狄侵齊

冬十月甲午叔孫得臣敗狄于鹹音義鹹音咸

傳狄者何注以日嫌夷狄不能偏戰故問也疏注解云正

以春秋之例偏戰日詐戰月夷狄不能偏戰今而書日故執不知問長狄也注蓋長百

尺疏注解云何氏蓋取關中記云秦始皇二十六年有長人十二見於臨洮身長百尺皆夷狄服天

識若曰勿大為夷狄行將滅其國始皇不知反喜是時初併六國以為瑞乃收天下兵器鑄作銅人十二

象之是也其文穀梁左氏與兄弟三人注言相類如
此長短不同者不可強合

兄弟疏

注解云正以別之三國不相援助是以知其非親兄弟

一者之齊一者

之魯一者之晉注不書者外異也疏

注解云案上文狄侵齊而云不

書者蓋以爲侵齊之狄非此等也

其之齊者王子成父殺之其之魯

者叔孫得臣殺之注經言敗殺不明故復云爾音義

復扶又反則未知其之晉者也其言敗何注据敗者內戰

文非殺一人也疏

注解云以春秋之義內魯爲王王於諸侯無敵之義但當言戰戰則

是內敗之文言敗某師則是內戰之文今敵其一人而言敗狄于鹹作內戰之經故難之大之也

注長狄之三國皆欲爲君長大非一人所能討興師

動衆然後殺之如大戰故就其事言敗疏

注長狄至爲君解云

正以各之一國故也何者雖非兄弟若不爲君羣行亦得即長人十二見于臨洮是也

其日何

注据日而言敗與公子友敗莒師于犁同非殺一人

文音義

又力

知反

疏

注解云

即僖元年冬十月壬午

公友帥師敗莒師于犁獲莒

人

不與爲是興師而伐魯季子待之以偏戰是也

大之也注如結日大戰其地何大之也注如大戰故

地何以書記異也注魯成就周道之封齊晉霸尊周

室之後長狄之操無羽翮之助別之三國皆欲爲君

此象周室衰禮義廢大人無輔佐有夷狄行事以三

成不可苟指一故自宣成以往弑君二十八亡國四

十音義

行下疏注魯成就周道之封解云正以周公孟反疏相成王而致太平遂封于魯故云爾

○齊晉至之後解云正以晉文齊桓皆率諸侯尊事天子此是齊晉之君子孫故云爾○長狄至之助解

云謂執持此意也○事以三成解云即長狄之三國共成其異是也言不可苟指一者明知其異亦不苟

指一事而已○故自宣成至四十解云案今春秋之經自宣成以下訖于哀十四年止有弑君二十亡國

二十四則知此注誤也宜云弑君二十也八是衍字亡國二十四也作四十者錯也其弑君二十即宣二

年趙盾弑其君夷獬四年歸生弑其君夷十年夏徵舒弑其君平國襄二十五年崔杼弑其君光吳子謁

伐楚門于巢卒爲巢人所弑二十六年衛甯喜弑其
君剽二十九年閻弑吳子餘祭三十年蔡世子般弑
其君固三十一年莒人弑其君密州昭八年陳招殺
偃師十一年楚子虔誘蔡侯般殺之十三年公子比
殺其君虔棄疾殺比十九年許世子止弑其君買二
十三年吳殺胡子髡沈子楹二十七年吳弑其君僚
定四年蔡殺沈子嘉十三年薛弑其君比哀六年齊
陳乞弑其君舍之屬是也其滅國二十四者宣八年
楚滅舒蓼十二年楚滅蕭十五年晉滅潞氏十六年
滅甲氏及留吁成十七年楚滅舒庸襄六年莒人滅
鄆齊滅萊十年遂滅偃陽十三年取郛二十五年楚
滅舒鳩昭四年遂滅厲八年楚滅陳十一年楚滅蔡
十七年晉滅賁渾戎二十三年胡子髡沈子楹滅二
十四年吳滅巢三十年吳滅徐定四年蔡滅沈六年
鄭滅許十四年楚滅頓十五年楚滅胡哀八年宋滅
曹之屬是其二十四也然則三國變異起自今年而

注者所以不言自今以後而言自宣成以往者蓋以文公之年已過半以後既不得其初故遺去其實楚人滅庸宋弑處曰莒弑庶其之屬皆由此禍耳或者弑君二十八亡國四十者春秋說文其間亦有經不書者故不同耳

十有二年春王正月盛伯來奔

傳盛伯者何疏

解云欲言諸侯不見存文欲言大夫而經書伯故執不知問

失地

之君也何以不名兄弟辭也注與郕子同義月者前

為魯所滅今來見歸猶當加意厚遇之疏

解云桓七年夏穀伯

綏鄆侯吾離來朝之下傳云皆何以名失地之君也是以此處見道失地之君即責云何以不名然則何

氏此處不言据穀鄧名者正以僖公二十年郈子來朝之下已注訖故也注與郈子同義解云即僖二十年郈子來朝傳云郈子者何失地之君也何以不名兄弟辭也何氏云郈魯之同姓故不忍言其絕賤明當尊遇之異於穀鄧也書者喜內見歸是也然則言同義者謂尊遇兄弟異於他姓是以不忍言其名不謂朝奔之文相似○月者至遇之解云正以穀鄧郈子之屬皆書時此特書月故須解也言前爲魯所滅者即莊八年夏師及齊師圍成成降于齊師傳云成者何盛也盛則曷爲謂之成諱滅同姓也是也

杞伯來朝

二月庚子子叔姬卒注卒者許嫁疏

注解云舊本皆無此注且理亦不須

疑衍字

傳此未適人何以卒疏

解云正以叔姬無所繫故知未適人也

許嫁矣

婦人許嫁字而筓之死則以成人之喪治之其稱子

何注据伯姬卒亦許嫁不稱子疏

注解云即僖九年秋七月乙酉伯姬

卒是

也貴也其貴奈何母弟也注不稱母妹而繫先君

言子者遠別也禮男子不絕婦人之手婦人不絕男

子之手音義

筓古兮反疏注禮男至之手解云既夕別彼列反疏禮及喪大記皆有此文

夏楚人圍巢

秋滕子來朝

秦伯使遂來聘音義

遂二傳作術

疏解云左氏穀梁皆作術字經亦有作術字者疑

遂字

誤

傳遂者何疏

解云欲言微者書名見經欲言大夫不錄其氏故執不知問

秦大夫

也秦無大夫此何以書賢繆公也何賢乎繆公音義

繆音

注据聘不足與大夫荆人來聘是也疏

解云莊二十三年夏荆人來聘傳云荆何以稱人始能聘也是也

以爲能變也其爲能變奈

何惟譏善靖言注譏淺薄之貌靖猶撰也音義

譏譏徐在淺反又子淺反又音賤尚書作截淺薄貌也賈逵注外傳云巧言也靖在井反撰也本或作編

皮勉反又必淺反本作
譏七全反又仕勉反

疏解云謂其念有淺薄

俾君

子易怠注俾使也易怠猶輕惰也音義

俾必爾反注同使也易以

鼓反注同疏

解云能撰善言故謂之君子言使此君情大臥反子易爲輕惰何者自恃其善而欲慢人

以自

尊矣而況乎我多有之惟一介斷斷焉無他技注一

介猶一槩斷斷猶專一也他技奇巧異端也孔子曰

攻乎異端斯害也已音義

一介古拜反一介猶一槩也尚書音古賀反斷斷丁

亂反專一也注同技其綺反槩疏而況至有之解云

古愛反奇其宜反本又作琦同我謂秦伯也言況於秦伯之懷其善言無算故曰多有之○惟一至他技解云秦伯之善雖曰無算若思念之皆是一槩專

一之事更無奇巧異端之術言其醇粹其善無擇矣
注斷斷至異端也解云即鄭注大學云斷斷誠一之
貌也他技異端之
技也是與此合其心休休注休休美大貌音義休

許虬反能有容注能含容賢者逆耳之言是難也注
美大貌

是難行也秦繆公自傷前不能用百里子蹇叔子之

言感而自變悔遂霸西戎故因其能聘中國善而與

之使有大夫子貢曰君子之過也如日月之食焉過

也人皆見之更也人皆仰之此之謂也疏注秦繆至
之言解云

事在僖三

十三年

冬十有二月戊午晉人秦人戰于河曲

傳此偏戰也

疏解云以其書日故知之

何以不言師敗績敵也

曷爲以水地注以水地者謂以水曲折起地遠近所

在也据戰于泓不言曲音義

折之疏注解云即僖二設反十二年冬宋公

及楚人戰于泓宋師敗績是也

河曲疏矣河千里而一曲也注河曲

流以据地明故可以曲地因以起二國之君數興兵

相伐戰無已時故不言及不別曲直而地以河曲明

兩曲也音義

數所角反不別彼列反下同

季孫行父帥師城諸及運注言帥師者刺魯微弱臣下

不可使邑久不修不敢徒行興師厲衆然後敢城之言

及者別君邑臣邑也音義

運二傳作鄆後皆同

疏注帥師至城之解云如此注者

正見隱七年夏城中丘之屬皆不言帥師故也言臣下不可使者即上八年公孫敖如京師不至復丙戌奔莒傳云不至復者何不至復者內辭也不可使往也之屬是也○言及至邑也解云正見昭五年莒牟夷以牟婁及防茲來奔彼傳云其言及防茲來奔何不以私邑累公邑也何氏云公邑君邑也私邑臣邑也累次也義不可使臣邑與公邑相次序故言及以絕之是也

十有三年春王正月

夏五月壬午陳侯朔卒注不書葬者盈爲晉文諱也晉

文雖霸會人孤以尊天子自補有餘故復盈爲諱音義

盈爲子僞反下文盈爲疏注解云盈者相接足之辭晉
爲周公皆同復扶又反疏文於僖二十八年之時此朔
之父陳侯款夏六月卒至冬末未葬而晉文會諸侯於
溫經有陳子是強會人孤令失子行亦是文公耻之是
以春秋遂卒竟不書款葬深爲文公諱也今若款之子
陳侯朔書葬則文公之惡還見是以此處須去朔葬使
若陳國之君例不書葬然故言盈爲晉文諱故僖二十
八年夏陳侯款卒之下注云不書葬者爲晉文諱行霸
不務教人以孝陳有大喪而
彊會其孤故深爲耻之是也

邾婁子蘧蒢卒音義

蘧蒢直居反

自正月不雨至秋七月注公子遂所致

世室屋壞音義

世室二傳作大室

傳世室者何疏

解云欲言君寢於例不書欲言宗廟未有世室之名故執不知問

魯

公之廟也注魯公周公子伯禽周公稱大廟魯公稱

世室羣公稱宮注少差異其下者所以尚尊周公音

義

大音泰下同

疏解云周公稱大廟即僖八年禘于大廟文二年大事于大廟是也魯公稱世室

即此經是也羣公稱宮即武宮煬宮之屬是也注解云正以廟者尊卑達名鬼神所居之稱今此稱異其

名知上尊周公故也

此魯公之廟也曷爲謂之世室世室猶世

室也世世不毀也注魯公始封之君故不毀也疏

解云

言謂之世室者猶世世室也

周公何以稱大廟于魯注据魯公始

封也封魯公以爲周公也注爲周公故語在下周公

拜乎前魯拜乎後注始受封時拜于文王廟也尚書

曰用命賞于祖是也父子俱拜者明以周公之功封

魯公也疏

注尚書至于祖解云甘誓文也

曰生以養周公注生以魯

國供養周公音義

養餘亮反注皆同供九用反下同

死以爲周公主

注如周公死當以魯公爲祭祀主加曰者成王始授

其茅土之辭禮記明堂位曰封周公於曲阜地方七

百里革車千乘蓋以爲有王功故半天子也音義

死

爲如字注同乘繩

疏

注加曰至之辭解云即周書作證反王于况反洛篇曰封人社壇諸侯受命于

周乃建大社于國中其壇東青土南赤土西白土北驪土中央黧以黃土將建諸侯鑿取其一面之土包以黃土苴以白茅以爲社之封孔氏云王者封五色土爲社建諸侯則各割其方土與之使立社燾以黃土苴以白茅茅取其潔黃取其王者覆四方者是其茅土之文耳○蓋以至子也解云正以天子千里方百里者百周公七百里方百里者四

然則周公之魯

乎曰不之魯也封魯公以爲周公主然則周公曷爲

不之魯注据爲周公者謂生以養周公死以爲周公

主周公不之魯則不得供養爲主欲天下之一乎周

也注周公聖人德至重功至大東征則西國怨西征

則東國怨嫌之魯恐天下迴心趣鄉之故封伯禽命

使遙供養死則奔喪爲主所以一天下之心于周室

音義

鄉許亮反

疏

注東征至東國怨云僖四年傳文

魯祭周公何以爲牲

注据廟異也周公用白牡注白牡殷牡也周公死有

王禮謙不敢與文武同也不以夏黑牡者謙改周之

文當以夏辟嫌也疏

注解云知黑牡爲夏牲者出明堂位文正朔三而改改天正十

一月者當以十三月爲正故言當以夏矣

魯公用騂犗注騂犗赤脊周牲

也魯公以諸侯不嫌故從周制以春爲差音義

騂息營反

犗音罔詩作剛騂犗赤脊也

疏注解云正以山脊曰罔故知騂犗爲赤脊矣

羣公不毛

注不毛不純色所以降于尊祖疏

注解云正以牲用純色祭祀之禮而

言不毛故以降于尊祖解之

魯祭周公何以爲盛注据牲異也音

義

盛成政反又音成

周公盛注盛者新穀魯公燾注

燾者冒也故上以新也音義

燾徒報反一本作濤音同冒也冒亡報反疏

注解云正以燾詰爲覆故也若似周書燾以黃土之類也然則言周公盛者謂新穀滿其器言魯公燾者謂上故下新
我可半平
羣公廩注廩者連新於陳上財令半相

連爾此謂方禘祭之時序昭穆之差音義

廩力甚反財令力呈

反下

疏解

云廩謂全是故穀但在上少有新穀財得同相連而已故謂之廩廩者希少之名是以鄭

注云廩讀如羣公廩之廩者是也注此謂至之差解云正以若其時祭菜食精饗羣公之饌一何至此故

知正是禘祭之時序昭穆之差所以降于尊祖故也

世室屋壞何以書譏何譏

爾久不修也注簡忽久不以時修治至令壞敗故譏

之言屋者重宗廟詳錄之以不務公室書月者知久

不修當蒙上月疏

注解云當蒙上月者謂蒙上秋七月也

十月新作雉門及兩觀傳云其言新作之何修大也修舊不書此何以書譏何譏爾不務乎公室何氏云務勉也不務公室亦可施於久不修亦可施於不務如公室之禮微辭也月者久也當即修之如諸侯禮是也然則彼久不修是以書月此亦久不修故知當蒙上月爾

冬公如晉衛侯會于沓音義

沓徒合反

狄侵衛

十有二月己丑公及晉侯盟還自晉鄭伯會公于斐音

義

斐本又作斐芳尾反

傳還者何疏

解云正以不言至而言還異於常例故執不知問

善辭也何善

爾往黨衛侯會公于沓至得與晉侯盟反黨鄭伯會

公于斐故善之也注黨所也所猶時齊人語也文公

前扈之盟不見序後能救鄭之難不逆王者之求上

得尊尊之義下得解患之恩一出三爲諸侯所榮故

加錄於其還時皆深善之音義

難乃旦反

疏注文公至見序解云即上

七年秋公會諸侯晉大夫盟于扈傳云諸侯何以不序大夫何以不名公失序也是也○後能至之難解

云即上九年春楚人伐鄭公子遂會晉人宋人衛人許人救鄭是也○不逆王者之求解云即上九年春

毛伯來求金經無不與之文是也○上得至之義解云即不逆王者之求是也○下得至之恩解云即公

子遂救鄭是也

十有四年春王正月公至自晉注月者爲臣子喜錄上

事音義

爲臣子僞反下爲後故爲同

疏

注解云出上文也

邾婁人伐我南鄙

叔彭生帥師伐邾婁

夏五月乙亥齊侯潘卒注不書葬者潘立儲嗣不明乍欲立舍乍欲立商人至使臨葬更相篡弑故絕其身明

當更立其先君之次音義

潘普干反更音庚下吳疏注楚更同弑申志反下同疏至

使至篡弑解云即下九月齊公子商人弑其君舍是其臨葬相篡弑之文

六月公會宋公陳侯衛侯鄭伯許男曹伯晉趙盾癸酉

同盟于新城注盟下日者刺諸侯微弱信在趙盾音義

盾徒疏注解云言信任在于趙盾若如盟日本反疏定否趙盾制之然是以下日以近之

秋七月有星孛入于北斗

傳孛者何疏

解云欲言是星星名未有欲言非星錄爲星稱故執不知問

彗星也

注狀如彗音義

孛步內反徐扶憤反

其言入于北斗何注据大

辰不言入又不言孛名疏

注据大至言入解云即昭十七年冬有星孛于大辰

是也○又不言孛名解云謂昭十七年直言于大辰不言所孛之星名今此言有星孛入于北斗故難之何者大辰非星名故也是以昭十七年傳云其言于大辰何彼注云据北斗言入于大辰非常名是也

北斗有中也注中者魁中何以書記異也注孛者邪

亂之氣孛者掃故置新之象也北斗天之樞機玉衡

七政所出是時桓文迹息王者不能統政自是之後

齊晉並爭吳楚更謀競行天子之事齊宋莒魯弑其

君而立之應音義

爭爭鬪之爭

疏

注北斗至所出解云即堯典云在璿璣玉衡以

齊七政七政謂日月五星也○齊宋至之應解云即下文九月齊公子商人弑其君舍十八年夏五月齊人弑其君商人是齊弑君事也十六年冬宋人弑其君處臼是宋弑其君事也十八年冬莒弑其君庶其是莒弑其君事也十八年冬十月子卒傳云子卒者孰謂謂子赤也何以不日隱之也何隱爾弑也弑則何以不日不忍言也者是魯弑其君事也

公至自會

晉人納接菑于邾婁弗克納音義

接菑在妾反又如字下側其反二傳作捷

菑

傳納者何疏

解云欲言得國下有不克之文欲入辭言不得國納者入辭故執不知問入辭

也其言弗克納何注据言于邾婁與納頓子于頓同

俱入國得立辭疏

注解云即僖二十五年秋楚人圍陳納頓子于頓是也此上言于邾

婁是其得國下云弗克納自相違故難之

大其弗克納也注克勝也鄭伯

以勝爲惡此弗勝故爲大疏

注解云即隱元年夏五月鄭伯克段于鄆傳云

克之者何殺之也殺之則曷爲謂之克大鄭伯之惡也曷爲大鄭伯之惡母欲立之已殺之如勿與而已矣注云克者詁爲殺亦爲能惡其能忍戾母而親殺之是也

何大乎其弗克納注

据伐齊納子糾恥不能納疏

注解云即莊九年夏公伐齊納糾傳云納者何

入辭也其言伐之何伐而晉卻缺帥師革車八百乘

以納接蓄于邾婁力沛若有餘注沛有餘貌音義

乘繩

證反沛若普
貝反有餘貌

而納之邾婁人言曰接蓄晉出也矍且

齊出也注出外孫也音義

矍且俱縛反
下子餘反

子以其指注

指手指疏

解云子謂卻缺言子以手指
指麾于邾婁令使納接蓄也

則接蓄也四

矍且也六注言俱不得天之正性疏

注解云地四生
金于西方地六

成水于北方皆非天數也言此
者喻皆庶子矣貴則皆貴矣

子以大國壓之注壓

服也服邾婁使從命音義

壓於甲反又
於輒反服也

則未知齊晉

孰有之也注設齊復興兵來納矍且亦欲服邾婁使

從命未知齊晉誰能使外孫有邾婁者音義

齊復扶又反下

同貴則皆貴矣注時邾婁再娶二子母尊同體敵疏

注解云蓋皆是右膝之子或是左膝之子言非姪姊所生也舊云子以其指者言凡立子之法以其手指相似則接蕃猶人之四指攬且猶人之六指皆異於人故曰俱不得天之正性也雖然攬且

也長注既兩不得正性又皆貴唯當以年長故立之

音義

長丁大疏解云雖皆不得正性但四反注同不如六故長者宜立矣

卻缺曰非

吾力不能納也義實不爾克也注如邾婁人言義不

可奪也故云爾引師而去之故君子大其弗克納也

注大其不以己非奪人之是此晉卻缺也其稱人何

貶曷爲貶注据趙鞅納蒯聵不貶疏

注解云即哀二年夏晉趙鞅帥

師納衛世子蒯聵于戚是也

不與大夫專廢置君也曷爲不與注

据大其弗克納實與注弗克納是而文不與文曷爲

不與大夫之義不得專廢置君也注不復發上無天

子下無方伯傳者諸侯本有錫命征伐憂天下之道

故明有亂義大夫不得專也接菑不繫邾婁者見挈

于卻缺也不氏者本當言邾婁接菑見當國也音義

見挈賢徧反疏注不復至道故解云欲道僖元年救
下音苦結反邢城楚丘之經悉是實與而文不與
文與此同其傳皆云上無天子下無方伯天下諸侯
有相滅亡者力能救之則救之可也今此不復言之
故云爾言諸侯本有錫命征伐憂天下之道故者正
謂保伍連帥本有共存恤之義是以上無天子下
無方伯之時容有存恤之道是故異於大夫耳○明
有至專也解云言大夫若有專廢置君者即是亂義
故曰明有亂義大夫不得專也正由大夫不得專廢
置故也○接菑至缺也解云据僖二十五年納頻子
繫頻也○不氏者解云据宣十一年納公孫甯儀行
父于陳皆言氏也○本當至當國也解云即隱元年
傳云段者何鄭伯之弟也何以不稱弟當國也注云
欲當國爲之君故如其意使如國君氏上鄭所以見
段之逆是也

九月甲申公孫敖卒于齊注已絕卒之者爲後齊魯

歸其喪有恥故爲內諱使若尚爲大夫疏

注解云言已絕者即上八

年公孫敖奔莒是也春秋之例大夫出奔之後即絕於大夫之位不復書其卒即公子慶父臧孫紇之屬是是以於此怪其書卒矣言爲後齊魯歸其喪有恥者即下十五年夏齊人歸公孫敖之喪傳云何以不言來內辭也脅我而歸之是也

齊公子商人弑其君舍

傳此未踰年之君也其言弑其君舍何注据弑其君

之子奚齊也連名何之者弑成君未成君俱名問例

所從也疏

注解云即僖九年冬晉里克弑其君之子奚齊傳云弑未踰年君之號是也

已

立之已殺之

注商人本正當立恐舍緣潘意爲害故

先立而弑之疏

注解云正以弑舍不書日見不遇禍則知商人本正明矣

成死

者而賤生者也

注惡商人懷詐無道故成舍之君號

以賤商人之所爲不解名者言成君可知從成君不

日者與卓子同音義

惡烏路反卓勅角反

疏

注從成君至子同解云即僖十年春

晉里克弑其君卓子彼下注云不日者不正遇禍終始惡明故畧之是也

宋子哀來奔

傳宋子哀者何疏

解云欲言宋君經書子哀欲言大夫文不言氏故執不知問

無

聞焉爾疏

解云即隱二年注云言無聞者春秋有改周受命之制孔子畏時遠害又知秦將燔

詩書其說口授相傳至漢公羊氏及弟子胡毋生等乃始記於竹帛故有所失也是也

冬單伯如齊齊人執單伯齊人執子叔姬

傳執者曷爲或稱行人或不稱行人注此問諸侯相

執大夫所稱例稱行人而執者以其事執也注以其

所銜奉國事執之晉人執我行人叔孫舍是也疏

注

云即昭二十三年晉人叔孫舍是也不稱行人而執者以已執也

注已者已大夫自以大夫之罪執之分別之者罪惡

各當歸其本音義

列別彼反

單伯之罪何道淫也惡乎淫

淫乎子叔姬注時子叔姬嫁當爲齊夫人使單伯送

之音義

惡音烏

然則曷爲不言齊人執單伯及子叔姬

注据夫人婦姜繫公子遂疏

注解云即宣元年三月遂以夫人婦姜至自齊

是也內辭也使若異罪然注深諱使若各自以他事見

執者不書叔姬歸于齊者深諱以起道淫書單伯如

齊者起送叔姬也齊稱人者順諱文使若非伯討疏

注不書至姬也解云言此者欲決隱二年冬十月伯姬歸于紀之屬書歸也言深諱者正以子叔姬有罪故也言以起道淫者謂深諱不言其歸即是以起道淫之義何者若更爲小事而見執何須諱其歸于齊今不言歸于齊而與單伯俱見執明其在道與單伯淫于歸事不醒醒矣或曰不書歸于齊者深諱其起道淫故也何者若言叔姬歸于齊齊人執單伯齊人執子叔姬即有道淫之理也○齊稱人至伯討解云即僖四年夏齊人執袁濤塗之下傳云稱侯而執者伯討也稱人而執者非伯討也是也

十有五年春季孫行父如晉

三月宋司馬華孫來盟注月者文公微弱大夫秉政宋亦蔽三世之黨二亂結盟故不與信辭不稱使者宋無

大夫官舉者見宋亂也錄華孫者明惡二國非以月惡

華孫也音義

華戶化反見賢徧反惡烏路反下皆同

疏

注月者至東政解云即公子遂是也

○宋亦至之黨解云即上九年傳云曷爲皆官舉宋三世無大夫三世內娶也是也言爲三世內娶之故三世妃黨皆強而爲君之所蔽故云蔽于三世之黨矣○故不與信辭解云正以春秋之例凡莅盟來盟例皆書時所以然者欲見王者當以至信先于天下故也是以桓十四年夏鄭伯使其弟語來盟注云時者從內爲王義明王者當以至信先天下是也今而書月故言不與信辭耳○不稱使至大夫解云正決鄭伯使其弟語來盟之文也○官舉至孫也解云大夫之義例不官舉而此言司馬者正以見宋之亂是以詳錄華孫明其書月不與信辭者不由

華孫之故也

夏曹伯來朝

齊人歸公孫敖之喪

傳何以不言來注据齊人來歸子叔姬疏
注解云在此年十二

月內辭也脅我而歸之荀將而來也注荀者竹篴一

名編輿齊魯以此名之曰荀將送也爲叔姬淫惡魯

類故取其尸置編輿中傳送而來脅魯令受之故諱

不言來起其來有恥不可言來也不月者不以恩錄

與子叔姬異音義

荀音峻竹篴也將送也篴婢繇反一音步賢反服虔音編韋昭音如

類反編必縣反一音篇郭璞音步典反輿音餘爲叔
于僞反下父爲子爲若爲實爲同傳直專反令力呈
反下疏注故取其尸解云謂取其死尸矣○不月至
同姬異解云正以下十有二月齊人來歸子叔
姬書月故也

六月辛丑朔日有食之鼓用牲于社注是後楚人滅庸

宋人弑其君處白齊人弑其君商人宣公弑子赤莒弑

其君庶其疏

注解云楚人滅庸即下十六年秋楚人秦
人巴人滅庸是也宋人弑處白在十六年

冬齊人弑商人在十八年夏五月宣公弑子赤即十八
年冬子卒傳云子卒者孰謂謂子赤也何以不日隱之
也何隱爾弑也者是也莒
弑其君庶其在十八年冬

單伯至自齊注大夫不致此致者喜患禍解也不省去

氏者淫當絕使若他單伯至也音義

解戶買反疏注大省所景反

至禍解也解云正以內大夫出聘例不書至故也○不省至伯至也解云正以昭十四年春隱如至自晉彼是被執而歸省去其氏今單伯存氏故解之

晉卻缺帥師伐蔡戊申入蔡

傳入不言伐此其言伐何疏

解云莊十年師解云爾故此弟子据而難之

至之日也其日何注据甲寅齊人伐衛日伐也疏

注

云即莊二十八年春王三月甲寅齊人伐衛衛人及齊人戰衛人敗績是也

至之日也注

嫌至日伐不至日入故日入也主書與甲寅同義疏
注主書至同義解云即彼云伐不日此何以日至之
日也何氏云用兵之道當先至竟侵責之不服乃伐
之今日至便以今日伐之故日以起其暴也是也然
則今此卻缺亦今日至便以今日伐之故書日以起
其暴也

秋齊人侵我西鄙

季孫行父如晉

冬十有一月諸侯盟于扈注不序不日者順上諱文使

若扈之盟都不可得而知疏

注解云上七年秋八月公會諸侯晉大夫盟于扈傳

云諸侯何以不序大夫何以不名公失序也公失序奈何諸侯不可使與公盟云云何氏云文公內則欲久喪而後不能喪娶逆祀外則貪利取邑爲諸侯所薄賤不見序故深諱爲不可知之辭不日者順諱爲善文也何者盟不日善文故也

者順

十有二月齊人來歸子叔姬

傳其言來何注据齊人歸公孫敖之喪不言來閔之也注閔傷其棄絕來歸此有罪何閔爾父母之於子雖有罪猶若其不欲服罪然注孔子曰父爲子隱子爲父隱直在其中矣所以崇父子之親也言齊人不

以棄歸爲文者令與教同文相發明叔姬于文公爲

姊妹言父母者時文公母在明孝子當申母恩也月

者閔錄之從無罪例疏

注所以至親也解云即言來以閔之是也○言齊人至發

明解云若以棄歸爲文即言子叔姬來歸不言齊人即宣十六年鄭伯姬來歸之文是今言齊人來歸故謂之同文也言相發明者言教爲齊所惡而來歸之今此亦爲齊人所歸之故曰相發明耳○時文至恩也解云正以下十六年秋八月辛未夫人姜氏薨十七年夏葬我小君聖姜傳云聖姜者何文公之母也是○月者至罪例解云正以棄歸之例有罪者時無罪者月故也其有罪者時即宣十六年秋鄭伯姬來歸是也其無罪者月成五年春王正月杞叔姬來歸之屬是也

齊侯侵我西鄙遂伐曹入其郭音義

郭芳夫反郭也

傳郭者何疏

解云欲言城郭經無城郭之文欲言非城郭上文言入故執不知問

恢郭

也注恢大也郭城外大郭音義

恢郭苦回反大也

入郭書乎

曰不書注圍不言入入郭是也疏

解云案諸舊本此傳之下悉皆無注

有注云圍不言入入郭是也者衍字耳

入郭不書此何以書動我也注

諱使若爲同姓見入郭故動懼我也動我者何內辭

也其實我動焉爾注齊侵魯魯實爲子叔姬故動懼

失操云爾鄉者不去幾亦入我郭故舉入郭以起魯

恥且明兵之所鄉苟得其罪則莫敢不懼音義

鄉許亮反

幾音祈

十有六年春季孫行父會齊侯于陽穀齊侯弗及盟

傳其言弗及盟何注据序上會也連盟何者嫌据盟

疏

注解云据序上會何得弗及盟乎是以問之云嫌据盟者嫌直据盟問之

不見與盟也

注與齊期盟爲叔姬故中見簡賤不見與盟侮辱有

恥故諱使若行父會而去齊侯不及得與盟故言齊

侯弗及亦所以起齊侯不肯音義

爲于疏注使若至偽反與盟解云

使若行父會齊侯于陽穀訖即棄之而去齊侯不及盟○亦所以起齊侯不肯解云若直言不及盟文體已具足見不得盟矣而更言齊侯不及者欲道是時不肯盟者是齊侯也若直言季孫行父會齊侯于陽穀不及盟不妨行父不及無以見齊侯不肯矣

夏五月公四不視朔注視朔說在六年不舉不朝廟者

禮月終于廟先受朝政乃朝明王教尊也朝廟禮也故

以不視朔爲重常以朔者始重也疏

注視朔說在六年解云即上六年注

云禮諸侯受十二月朔政於天子藏于太祖廟每月朔朝廟使大夫南面奉天子命君北面而受之是也不舉至爲重解云正以視朔之時必有朝廟之禮故上六年經云閏月不告月猶朝于廟是也今此經直言四不

視朔不道不朝廟故解之○常以至重也解云言十二月之政令所以不在年初一受之而已必以月之朔日受之者重月之始故也

傳公曷爲四不視朔注据無事也公有疾也注以不

諱舉公知有疾公有疾乃復舉公是也音義

復扶又反下同

疏

注公有至是也解云即昭二十三年公如晉至河公有疾乃復是也

何言乎公有

疾不視朔注据有疾無惡也疏

注解云即昭二十三年傳云何言乎公有

疾乃復殺恥也者是

自是公無疾不視朔也注有疾無惡不當

書又不言有疾者欲起公自是無疾不視朔也疏注

自至朔也解云即鄭氏云魯自文公四不然則曷爲視朔視朔之禮已後遂廢者正取此文也

不言公無疾不視朔有疾猶可言也無疾不可言也

注言無疾大惡不可言也是後公不復視朔政事委

任公子遂

六月戊辰公子遂及齊侯盟于犀丘音義

犀音西左氏作鄭丘穀梁

作師丘

疏解云正本作菑丘故賈氏公羊曰菑丘穀梁曰師丘是也今左氏經作鄭字

秋八月辛未夫人姜氏薨

毀泉臺

傳泉臺者何疏

解云泉臺之名自前未有今而言毀故執不知問

郎臺也注

莊公所築臺于郎以郎譏臨民之漱浣音義

漱素侯反浣戶

管疏

注解云即莊三十一年春築臺于郎傳云何以反疏書譏何譏爾臨民之所漱浣也是也然則何以

知泉臺爲郎臺正以彼傳云譏臨民之所漱浣書與此泉臺之義合故也郎臺則曷爲謂

之泉臺未成爲郎臺注未成時但以地名之既成爲

泉臺注既成更以所置名之毀泉臺何以書譏何譏

爾築之譏毀之譏先祖爲之已毀之不如勿居而已

矣注但當勿居令自毀壞不當故毀暴揚先祖之惡

也築毀譏同知例皆時音義

令力呈反疏注解云言暴步卜反

築毀譏同

者即上傳云築之譏毀之譏是也言知例皆時者正以此經文承月下恐蒙月故如此解

楚人秦人巴人滅庸音義

色布加反

冬十有一月宋人弑其君處白音義

處白二傳作杵白

傳弑君者曷爲或稱名氏或不稱名氏大夫弑君稱

名氏賤者窮諸人注賤者謂士也士正自當稱人大

夫相殺稱人賤者窮諸盜注賤者窮諸人者言士先

自稱人今弑君亦稱人故曰窮諸人矣云賤者窮諸

盜者言士之賤名不過于盜故也降大夫使稱人降
士使稱盜者所以別死刑有輕重也無尊上非聖人
不孝者斬首梟之無營上犯軍法者斬要殺人者刎
頭故重者錄輕者略也不日者內娶略賤之音義別彼
列反梟古堯反要一遙反刎亡疏注故重至略也解
粉反頭如字本又作脰音豆疏云謂大夫弑君罪
重故稱名氏責之深若大夫相殺罪輕於犯君故降
稱盜者義之輕然也○不日至賤之者已說于上

十有七年春晉人衛人陳人鄭人伐宋

夏四月癸亥葬我小君聖姜晉義聖姜二傳作聲姜

傳聖姜者何疏

解云欲言夫人諡異其夫號欲言文爲妾而卒葬竝書見故執不知問文

公之母也

齊侯伐我西鄙

六月癸未公及齊侯盟于穀

諸侯會于扈

秋公至自穀

公子遂如齊

十有八年春王二月丁丑公薨于臺下

秦伯瑩卒注秦穆公也至此卒者因其賢音義

伯瑩乙耕反何

云穆公也左氏穆公子康公

疏

注解云正以秦是戎狄春秋外之往

解之而左氏爲康公者與此別穀梁無解

夏五月戊戌齊人弑其君商人注商人弑君賊復見者

與大夫異齊人已君事之弑之且當坐弑君音義

復扶又反

下同見

疏

注解云春秋之義諸是弑君之賊皆不復見賢徧反所以賤之是以宣六年書晉趙盾衛孫免侵

陳傳云趙盾弑君此其復見何注云据宋督鄭歸生齊崔杼弑其君後不復見傳又云親弑君者趙穿也注云

復見趙盾者欲起親弑者趙穿非盾是也今此商人於上十四年弑其君舍而復見者正以其爲君故也與大

夫異者齊人以君事之殺之宜當生弑君然則商人弑其君舍而存之欲責臣子不討賊故也是以莊二十二年注云不與念母而譏忌省者本不事母則已不當忌省猶爲商人責不討賊義亦通於此

六月癸酉葬我君文公

秋公子遂叔孫得臣如齊注不舉重者譏魯狠使二大

夫出虛國家廢政事重錄內也疏

注秋之常今而悉舉故

解之穀梁傳云使舉上客而不稱介不正其同倫而相爲介故列而數之也者亦是直舉重之義也而言重錄內者正以外大夫未有竝見者於內唯有此經及定六年夏季孫斯仲孫何忌如晉之文故知正是重錄內也

冬十月子卒

傳子卒者孰謂謂子赤也何以不日注据子般卒日

隱之也何隱爾弑也弑則何以不日注据子般卒日

音義

殺音試下及注同

疏

注解云即莊三十二年冬十月乙未子般卒是也

不忍言

也注所聞世臣子思痛王父深厚故不忍言其日與

子般異疏

注故不忍至般異解云正以子般爲所傳聞之世故也是以莊三十二年子般卒之

下何氏云殺不去日見隱者降子赤也是

夫人姜氏歸子齊注歸者大歸也夫死子殺賊人立無

所歸留故去也有去道書者重絕不復反疏

注歸者大歸也解云

凡言大歸一出不反之辭若紀侯大去其國之類故言歸者大歸也○有去至復反解云正以常事不書故也

季孫行父如齊

莒弑其君庶其

傳稱國以弑何注据莒人弑其君密州疏

注解云即襄三十一

年十有一月莒人弑其君密州是也稱國以弑者衆弑君之辭注一人

弑君國中人人盡喜故舉國以明失衆當坐絕也例

皆時者略之也疏

注例皆至之也解云謂是失衆而稱國以弑者皆書時以略之即定

十三年冬薛弑其君比之屬是也若然昭二十七年夏四月吳弑其君僚亦是稱國而書月者彼非失衆

但以見弑之義故不書時賤之是以何氏云不書閻
閻弑其君者爲季子諱明季子不忍父子兄弟自相
弑讓國閻欲其享之故爲沒其罪也
月者非失衆見弑故不略之者是也

春秋公羊傳注疏卷十四

春秋公羊傳卷十四考證

盛伯來奔○盛伯左氏穀梁經作邲伯

傳失地之君也注與邲子同義○劉敞曰邲本未亡公
羊強謂之亡此盛伯來奔魯公羊謂即莊公時所滅
者莊公至今七十餘歲矣注曰與邲子同義亦可怪
也

秦伯使遂來聘傳惟譏譏善靖言至能有容○

臣召南

按此傳引用秦誓而稍裁節注疏皆不以秦誓解之

何也惟譏譏善諍言俾君子易怠而況乎我多有之

即誓之惟截截善諄言俾君子易辭我皇多有之也

惟一介斷斷焉無他技其心休休能有容即誓之如

有一介臣斷斷猗無他技其心休休焉其如有容也

公羊著竹帛時當漢初所見尚書本字句或異耳疏

於傳注之意全未發明其解一介斷斷謂即秦伯自

言誤矣又按秦穆公任好以文六年卒左氏可徵自

令狐以還皆康公事公羊家見經不書穆公之卒遂

誤以此秦伯爲穆公也

晉人秦人戰于河曲傳河千里而一曲也○劉敞曰河曲地名耳豈謂千里一曲乎若千里一曲悉可名之河曲是三河之間無他地名直曰河曲而已不亦妄乎何休云明兩曲益非也

世室屋壞傳周公用白牡魯公用騂犂○白牡各本皆誤作白牲

臣浩

按此傳據魯頌白牡騂剛之文也釋

文于騂犂注云詩作剛于白牲不注當是牲牡字形

相類從來刊本誤耳明堂位亦曰牲用白牡今改正

臣召南

按春秋繁露郊事對篇春秋曰魯祭周公用

白牡色白貴純也又曰成王使祭周公以白牡上不得與天子同色下有異于諸侯尤足以証此文白牲之訛

晉人納接蓄于邾婁傳晉卻缺帥師革車八百乘以納接蓄于邾婁○左傳作趙盾以諸侯之師八百乘納捷蓄于邾與公羊異

單伯如齊齊人執單伯傳內辭也疏于歸事不醒醒矣
○此句必有錯誤各本皆同無可考証

宋司馬華孫來盟注宋無大夫官舉者見宋亂也○劉
敞曰司馬即大夫之官華孫即大夫之名何謂無大
夫乎臣召南按華孫公族之大夫非戚黨也注尚以
爲蔽於三世之黨是不可解

單伯至自齊疏正以昭十四年春隱如至自晉○各本
俱作意如非也公羊經自作隱如今照經文改正

諸侯盟于扈注不序不日者順上諱文○劉敞曰非也
扈地雖同文公之行有善惡惡自當貶善自當褒何
有貶其前會之惡遂舉地而諱之乎

齊侯侵我西鄙遂伐曹入其郭傳入郭不書○劉敞曰
入郭殆矣勢不輕於圍豈得不書

夏五月公四不視朔傳自是公無疾不視朔也○蘇轍
曰公羊言自是無疾不視朔也定哀之間子貢欲去
告朔之餼羊蓋不復視朔矣此公羊所以爲此言也

然而五月書四不視朔則六月視朔矣視朔之廢非始於此也

齊侯伐我西鄙○左傳注西當爲北蓋經誤


秦伯瑩卒注秦穆公也至此卒者因其賢○臣召南按

左傳史記皆以瑩爲康公何休所以必解爲穆公者以前十二年秦伯使術來聘傳以爲賢穆公又引秦誓文以實之則公羊子已先以瑩爲穆公矣注謂因其賢亦不可信春秋書外君之卒因赴而書不關於

賢不賢也



春秋公羊傳卷十四考證



覆校官編修臣蕭際韶

校對官檢討臣王鍾健

謄錄貢生臣張賦京